

Asisko gutuna

2013ko Urria. 4. printzipioa. Bidea elkarrekin egin, anaitasunez bizi

60. zenbakia

Asis Sarea eguneroko bizimoduan espiritualtasun frantziskotarra ezagutu edo partekatu nahi duten lagunen sare sozial irekia da.

Azken Gutunak begirada lantzeaz eta hezteaz jardun zaizkigu. Jainkoaren begirada geure egin nahi dugu. Horregatik laugarren printzipioari dagokion Gutun hau ere ildo berean kokatu nahi dugu. Anaitasuna eta elkarte izatea begiradan oinarritu. Elkarki begira eta elkarki so gera gaitezen, egunerokoa partekatzen dugun pertsonen baitan murgilduz, senide eta elkartekide ditugunak barnetik ikuskatzeraino.

Eta begirada horretatik egin dezagun otoitz, zuzen gatzazkion Jainko Aitari, bihotza izenez beterik dugula.

Gogoetarako gaia

Senide izatea barrutik eraikiz.

Senide izateaz mintzo garenean, ia beti zerbait egiteaz jarduten gara: senitartea sortu, senideen alde borrokatu, senide lokarriak landatu ... Ekintza hauetan ateratzen zaigu alderik onena: besteen alde zerbait egin nahia, mundu zuzenago eta bizitzeko hobea eraiki, besteen premien alde jarri. Nolako poza berriek dioten bakoitzean, jendeak besteen alde ematen duela aurpegia, konprometituta bizi dela, solidarioa dela, hain zuzen krisia eta ustelkeria eta gerrako berriak bor-bor airean dabiltzanean.

Baina hori inportantea izanik ere, ez da gauza bakarra, ez eta oinarritzkoena ere. Senide izateak badu beste alde bat ez hain luzitua, hartaz konturatzea zail egiten zaiguna. Bihotzaren sentiberatasuna da hori, bestea senide gisa sumatzen ikasiz doana. Koalitate pasiboa da eta hartzen dena, datorkigunari adi egotetik datorrelako, ez gauzak egitetik soilik. Landu daiteke eta landu behar da, baina azkenik norbera konturatzen da inportanteena eman egiten zaigula: begirada berria, berritua, bestek pertsona gisa

duen balioari erreparatzen diona, bestek dagienetik eta dioenetik eta daukanetik at, aurreiritzirik eta sailkapenik egin gabe ...

Hemen egunerokoa dugu froga-harri, egunez egun gurekin dugun lagun taldea: emaztea edo senarra, neure espero eta premiei gero eta gutxiago erantzuten diona (badirudi ez dagoela elkarrekin ulertzeko modurik); inori kasurik egiten ez dion bizilagun gogaikarria; zaindu eta medikuagana eramane behar dudana familiartekoa, beti kezaz dabilena eta ia inoiz esker onik edo txerazko hitzik ez duena; langabezia dagoen laguna, egun osoan krisiaz kezka (arrazoiz) dena eta okerrago denez ohizko zuen itxaropeneko begirada galdu duena; orain gutxi alargundu den ezaguna eta begietan hortik dator kion hutsunea antzematen zaiona ...

Egunerokoan begiratu senideari, eta hura ikusi eta aintzat hartu. Senide izatea eraikitzeke modu honek berritu egiten gaitu barrutik, kanpotik ezer antzematen ez bazaigu ere.

Ebanjelioko pasartea: Lk 5,27-32

Ondoren, atera zen Jesus handik eta Lebi izeneko zergalari bat ikusi zuen, zerga biltzeko mahaian eseria, eta esan zion: «Jarraitu niri.» Lebi, dena utzirik, zutitu eta jarraitu egin zion. Lebi bazkari ederra eman zion Jesusi bere etxean; Jesusekin eta honen ikasleekin batera jende asko zegoen mahaian, zergalari eta beste. Fariseu eta beraien lege-maisuak marmarrean ari zitzaizkien ikasleei, esanez: «Nolatan jaten eta edaten duzue zergalari eta bekatariekin?» Jesusek erantzun zion: «Ez dute osasundunek sendagilea behar, gaixoei baizik; ez naiz zintzoei dei egitera etorri, bekatariei baizik, bihozberri daitezen».

Frantziskotar espiritualtasuna

Ondoren, Jaunak hain fede handia eman zidan eta ematen dit Eliza santu erromatarraren moldearen arabera bizi diren apaizekiko, beraien ordenazioa dela-eta, ze, pertsegituko banindute ere, beraiengana jo nahi baitut. Eta ... bizi diren parroketan ez dut predikatu nahi beraien borondatea ez bada. Apaiz hauek eta gainerako guztiak nahi ditut errespetatu, maitatu eta neure jaun gisa ohoratu. Eta ez diot haien bekatuari erreparatu nahi, Jainkoaren Semea sumatzen baitut haiengan eta nire jaun baitira (Test 6-9).

Harrigarria da Frantziskoren bihotz hori, hainbateko misterioa pertsonetan sumatzeko argitasun eta gardentasunez betetakoa, pertsona horiek, hartua zuten dei eta eginkizunari egoki erantzuten ez badiote ere, eta are bera pertsegitzen badute ere: "Jainkoaren Semea sumatzen baitut haiengan". Baina sortzen digun harriduraz gain, hor ikusten da Frantziskok horretaz duen kontzientzia garbia eta buruargia: harturiko dohaina duela, "Jaunak hain fede handia eman zidan eta ematen dit ... apaizekiko". Oparia eman zitzaion pertsonengan sinesteko eta pertsonen fedetik begiratzeko, haiek "Jainkoaren seme-alaba" kontsideratzeraino. Pertsonak modu berrian kontsideratzeko fedea eman zitzaion oparitan, haiek maitatu, ohoratu eta zerbitzatu nahi izateraino.

Otoitza

Jesu Kristo Jauna,
batasunaren zutabe
eta senitartearen errege.

Bidal guri goizero
zure espirituaren turrusta bat.
Eraitsi, banantzen gaituzten harresiak,
egoismoak, urguiluak eta
handiusteak eraiki dituztenak.

Urrundu gure etxetik
liskarrak sortzen dituzten inbidiak.
Gorde gaitzazu inhibizioetatik.
Baketu gure inpultsuak
eta bete gaitzazu baretasunez.

Sorrarazi gure baitan
korronte sentibera eta beroak,
elkarri barkamena eta ulermena
eman diezaiozun,

elkar susper eta ospa dezagun
ama beraren seme-alaba bezala.

Ken gure bidetik
etsaigo eta gorrotoak;
hautsi gure blokeoak,
horrela elkarrekiko
irekiak eta leialak,
egiatiak eta zinezkoak gaitezen.

Haz bedi gugan konfiantza
zuhaitz hostotsu gisa,
haren itzalpean pozik senti gaitezen.

Eta horrela argudio sumagarri eta profetiko
izango gara munduaren aurrean,
zu, oi Jesus, gure artean
zaudenaren argudio. Amen.

Ignacio Larrañaga

Gutuneko azken hitzak

"Ez ahaztu inoiz besteak zurekin konta dezaketela eta zuk beraienkin konta dezakezula" (Alejandro Dumas)

2013ko urriko eguneroko Ebanjelioa

Egunero Ebanjelioa irakurri nahi duten lagunek, egun bakoitzari dagozkion irakurgaien arabera, hemen dauzkate urriko erreferentzia guztiak:

1 Lk 9,51-56	8 Lk 10,38-42	15 Mt 11,25-30	22 Lk 12,35-38	29 Lk 13,18-21
2 Lk 9,57-62	9 Lk 11, 1-4	16 Lk 11,42-46	23 Lk 12,39-48	30 Lk 13,22-30
3.Lk 10,1-12	10 Lk 11,5-13	17 Lk 11,47-54	24 Lk 12,49-53	31 Lk 13,31-35
4 Lk 10,13-16	11 Lk 11, 15-26	18 Lk 10, 1-9	25 Lk 12,54-59	
5 Mt 7,7-11	12 Lk 11,27-28	19 Lk 12,8-12	26 Lk 13,1-9	
6 Lk 17,5-10	13 Lk 17,11-19	20 Lk 18,1-8	27 Lk 18,9-14	
7 Lk 10,25-37	14 Lk 11,29-32	21 Lk 12,13-21	28 Lk 6,12-19	

Urrian elkarrekin ospatuko dugun otoitza 31an izando da 19:30tan